

四庫全書

集部

欽定四庫全書

水雲村橐卷十二

元 劉壇 撰

祭文

代祭陳樞密文

嗚呼鉅人長德孰盛盱邦猶洛社英巍巍堂堂宏頤二  
老清節直氣竭來太晚弗逮執摯惟矩齋翁如曾靈光  
亦復不久歸白雲鄉猶幸千峯作擎天柱魁樞正明風

悲憊露公有鴻文寬平且柔儼類其人冠佩優游公有  
達識著龜先見斟酌肯綮與世舒卷公有盛福四顧鮮  
儔富貴備矣澹若無求嗚呼四顧之疏世許以正晚節  
告君人心天命五羊之歸南物不攜明月滿舟見者嗟  
嘻心懷魏闕老益弗釋匪為袞裳為國一出古音拙出必

調鼎乃遽騎箕造朝幾何丹旐翩飛僕也何人適仕洛  
社屢瞻履舄布武堂下幸依耆雋驟失典刑傷嗟諸老  
接踵凋零公之不出世遺憾矣亦既出只哀哉止此椒

漿桂酒敬酌一尊公兮歸來為歌招魂

為吾母祭舅文

嗚呼人生至痛莫如逆境以老哭壯情何能忍兄弟同處踰六十年如足如手曾無間言我遷都城相距百里山川雖隔心則孔邇旬無音信我思懸懸豈其病邪憂慮萬千避難來歸幸聚匝月憐汝病深我心如噎尚期小瘳怡怡優游竟夢一枕長往弗留我老心孤望汝送死豈料此歸乃反哭汝嗚呼兄弟四人今喪其三老懷

悲酸情何以堪我有疾苦每告吾弟我有看核亦每遠  
寄凡得汝書我再四觀我書復汝聞汝亦歡汝常來城  
惟恐汝去汝別我歸我泪如注而今而後永絕往來望  
斷天涯獨雁聲哀三奠永決傷哉倒置杯中之酒皆吾  
之泪

自祭舅文

嗚呼幼依侍側事公如父公雖方嚴視甥猶子歲在丙  
寅甥方締姻蹟則異處情誼益親戊辰如城公不忍別

我每思公音問不絕公實愛我凡事必咨我每感公奉  
承弗辭去臘兵戈避地還里復欣侍公公則病矣公雖  
伏枕見我輒興口不能言心若歡欣公疾已亟猶顧謂  
曰以藥救我世無盧扁遂隔古今我實負公痛悔彌深  
思公平生淚不可忍公如可贖何愛九墮垂三十年甥  
舅團欒永懷公恩令人心酸放牛馬走為助喪望報公  
止此逾覺悽愴素車在途丹旐在門高堂空空誰能反  
魂一尊永決灑泣釋手哀哉此酒能復飲否

祭母文

嗚呼母子團欒四十餘年母今往矣兒無母憐兒憂誰  
知兒病誰臆生我劬勞欲報罔極念昔幼日孤寡茫然  
撫育成人酸寒萬千孰知此悲惟母與子兩心相通何  
間生死母恩甚厚母望甚深兒學不達莫慰母心養志  
多虧媿負吾母兒罪通天天誅以斧日吉時良歸於高  
岡母不可留兒割肺腸母子平生決茲一奠哀哉痛哉  
泉下相見

祭涂教授文

名清甫

惟公古心直道碩學雄辭臯比儼臨士喜得師共期三  
載教雨其滋天乎奈何奄忽止斯悲夫藥餌缺於奉侍  
棺斂出於有司雖定數之莫逃亦人事之多違內交一  
年荷公心知遽隔幽冥泣然傷悲沿檄承乏暫踵蕭規  
祖奠柩前儀舟江渭家山匪遙魂兮來歸已而已而哀  
哉已而尚享

水雲村彙卷十二

欽定四庫全書

水雲村橐卷十三

元 廉 壤 撰

雜著

記夢

丙戌歲秋孟暑盛一日晝困假寐夢偃仰小榻上氣奄奄欲死旁若有言者曰死矣已乃氣果絕而死死時亦無所苦惟覺神意飄飄然如行雲如飛烟騰上太虛間

不知晝夜明晦不見山川人物鬼神形狀不食而不飢  
不飲而不渴不扇而不熱不衣而不寒鴻濛汗漫蕩漾  
寥廓而亦無附麗倚著者久之忽爽然自悟曰此其死  
耶於是小立於無人之境而凝想乎平生自襁褓鞠父  
母之懷而至於總丱至於冠且婚且生子而且將老矣  
其間若仰事俛育幹蠱承家親師取友讀書作文運智  
謀競名利其瑣瑣者若求田問舍蓄書備器日用飲食  
貿遷有無又若經涉亂離酬應世故生死聚散哀樂憂

懼百種千態意必有一足恃以為長且久者乃今口欲  
一言而不能發手欲一操而無可伸平生積累竟無尺  
寸絲毫相與始終即不知四十年營營役役所成何事  
卒亦何所得乃且併吾之五官四體不得自為之主耶  
顧今之飛揚升降乘雲御風若存若亡無聲無色者又  
安知不日久日消寢以磨滅而人世紛紛正徒苦耳因  
一笑而覺記所夢如此度他日真死不過如此而世人  
之生死必且皆如此

汀寇鍾明亮事略

初明亮之首亂也汀州草間匹夫爾非有權位號召世資憑藉奮臂山澤一呼數萬衆斬刈剽竊飄蕩震洶揅江閩數郡之地動江閩浙三省之兵貴臣重將禪校士馬因是物故者甚衆連城累邑公私供億耗費者甚侈師之所經寇之所及男女老稚被執僇貲財廬舍罹蕩燬者甚多上煩廟堂應接諸省奔赴竭數載之力僅得明亮至軍前一面而詐降無實傲睨反覆氣凌威欒未

嘗獲一交鋒決勝明亮竟偃然得保首領以歿既歿衆  
猶畏服止奉一木主爾藉其虛聲餘烈尚能統御所部  
不即降潰彼何道以臻此此之謂盜亦有道者歟幸明  
亮非有英畧霸圖止於作賊不過殺人民驅牛畜擁子  
女坐金玉堆中假息林藪又幸國方盛強兵力翕合故  
能磨以歲月待賊自斃儻若前古末造榦弱不支復加  
他警策應弗及則漫溢胚胎如赤眉黃巾僊芝黃巢之  
亂未可知也有脫身賊中者具言明亮有威風多智略

得操縱誦詐之術似非田野農夫比然殘忍嗜殺異於人類其祭鬼常取孕婦剗剔為笑樂被其虜殺者皆淫刑屠割呼號徹天極痛楚而後得死每言必殺人則人始不敢近而其衆固可全也迹其所為直盜賊之雄耳元凶鉅惡腥聞昊穹顧幸佚罰曾不及顯正刑誅寸躰縷膾以謝諸郡荼毒之民大可恨也南豐壞接閩贛適當其衝至元丙戌以來閱歷六寒暑震撼萬狀雖城市幸完然軍馬經從無歲無之至其急也則無日無之驚

擾需求比屋俱敝村落殆有甚焉粟空於廩魚竭於池  
犬雞蔬果俱不得有加以捶紮淫濫視寇虐特不殺而  
已鄂都石城瑞金建寧諸邑則兵冠無至禍尤慘烈至  
於庚寅四面蠭起明亮邱元之外贛吉有謝主簿劉六  
十樂安有盧大老南豐有雷艾江之徒乘時響應俱煩  
省官親提重兵隨處逐捕賊雖終敗而受禍衆矣予聞  
故老道州里舊事謂豐於宋為上縣炎紹南渡承平百  
年民不識兵繁庶鉅麗甲江右逮紹定己丑庚寅間劇

盜廖十六廖雲廖雷輩起廣昌閩寇劉四官輩又薦食  
汀劒邵武諸郡久而益熾出犯我江西己丑歲十月十  
有六日廖寇由廣昌來犯西門王宰日宣備禦無策斥  
堠不嚴賊已入關至三聖堂前一跛僧猶問曰賊在何  
處俄被一刀死人始知賊至居民奔潰幸其僅留一夕  
即去且不縱火故逃竄不前者或伏匿得全上司調江  
州兵百屯安禪寺戍守十有二月又調馮將一軍至屯  
西門甫解器械衣裝小憇十三日寇猝至石背舞皮繖

張青蓋持木扉以蔽矢石馮亟前迎拒而軍遠來疲乏  
未熟地利復衆寡不敵馮被殺所部潰奔多死寇長驅  
入郭是時居民恃有軍來無恐逃者多還而不虞寇至  
也由是死者無數火官府民廬幾盡數日乃去攻建昌  
明年王宰以失守罪被劾罷選南城楊尉應廉來涖邑  
楊廬陵人也號才能吏招集流逋以漸興補遠邇賴之  
朝命御前諸軍副都統制夏訓武友諒將池司步騎至  
又命蔡將某將荆湖步騎至又命張總管睦將江西步

兵至進屯廣昌賊遁松梓山池司兵攻破之時又起復  
陳工部韓知南劍州兼福建提刑江西招捕之職掎角  
平寇陳公有威名多方略招致廖寇俱隸戲下賊衆被  
官軍勦滅者不勝計亂遂以平而陳招捕之名滿東南  
矣楊宰應接軍務撫摩創痍為尹六年百廢具舉輯荒  
殘為繁庶化杌隉為安平自是豐復為壯邑二十餘年  
雖嘉熙庚子有上石謝八屠之亂淳祐乙巳有廣昌符  
五十之亂淳祐辛亥有新城關社之亂然禍不至邑邑

得以全逮寶祐戊午歲新城李尉復來攝邑郡吏賴青  
臨之督月解錢帛峻甚青紅由帖徵催東濕加以大家  
三譚二趙苛虐諸佃咸不堪命攀龍者有張半天何白  
眉者嘯聚起木瓜山石牛洞五月二十日鋪時率百衆  
寇邑首吏余璋急斷浮橋賊憚水東官民賴此得逃逮  
昏賊始渡留一夕焚譚之廬延燎城隍廟一帶居肆明  
日乃歸巢諸司調撫贛旗馬軍合寨尉卒進討擒其魁  
渠赴建昌凌遲梟令繼治激變罪李權宰以劾罷二趙

徙潮惠州家屬分徙劍邵沒其貲以贍軍三譚罰米贖  
罪賴青杖脊黥配死郡獄妻子徙外邑亦沒其貲逮咸  
淳戊辰夏諸鄉水災乏食始則發廩劫禾終則嘯聚弄  
兵永福作善者有羅動天詹花五者率羣兇起峽村八  
月八日清晨以百餘衆破邑駐半日焚治寺民居市肆  
殺略而去諸司又調兵討平之魁渠俱凌遲伏誅治失  
守罪縣令楊從政賤以劾罷首吏歐實死郡獄甫七年  
逮德祐乙亥歲十有二月江西諸郡受兵大執震擾尉

寨兇卒乘時略邑而賊首陳捷江七龍輩起中和保則  
擁衆却村落是時南北未一有司招安之假以虛名使  
散其衆明年丙子歲七月初吳制置浚即廣昌開湘府  
聚兵興復諸邑咸應陳捷為制置司都統制率鄉丁戍  
南豐江七龍從之八日晨興有北兵七百馬三百自建  
昌掩至陳江拒於東郊大敗走其死於兵刃者甚衆士  
民之不及避者死尤衆橫屍路衢府寺民廬廬肆一炬  
幾盡自有邑以來兵火苗患無甚於此承平遺蹟埽地

盡矣纔十餘年生聚未復而鍾邱相挺又如此距紹定  
己丑庚寅整六十載其間禍亂相仍肝腦塗地令人心  
酸有不忍言者何吾豐生靈獨不幸至是哉因紀明亮  
事併載故實痛定思痛歷歷眼前後賢覽觀尚撫然而  
三歎也大德戊戌歲四月上吉聊述事略而其詳則具  
於嘉禾禦寇錄云

鄉飲酒議

按古禮冠昏喪祭有射有燕有聘有鄉飲酒今射燕聘

廢已久矣冠禮間有行者然甚少晉與喪祭雖不廢然  
不盡如古其準古盡合惟行鄉飲則必謹焉三代之禮  
僅存止此可歎亦可喜也鄉飲酒始於周以鄉大夫主  
其禮故曰鄉周禮天子六鄉鄭司農云百里內為六鄉  
外為六遂司徒職云五家為比五比為閭四閭為族五  
族為黨五黨為州五州為鄉則州為二千五百家鄉為  
一萬二千五百家也曰鄉大夫每鄉置鄉一人其次每  
州中大夫一人為州長其次每黨下大夫一人為黨正

又其次每族上士一人為族師又其次中士一人為閭胥又其次下士一人為比長而鄉大夫則總之者也諸侯三鄉卿二鄉大夫一鄉各有鄉大夫天子諸侯之鄉則君其國有其地也大夫士非國君未知鄉在何所

鄉有鄉學鄭司農云鄉大夫飲賓於庠序尊賢養老謂在學也鄉則三年一飲州則一年再飲黨則一年一飲凡鄉學取致仕在鄉之中大夫為父師取致仕之士為少師處於學中名曰鄉先生以教鄉中之人每年入學

三年業成升於君若天子之鄉則升學士於天子諸侯  
之鄉則升學士於諸侯凡升必用正月將升必先為鄉  
飲之禮鄉大夫與鄉先生謀諸學最賢者使為賓次者  
使為介次者使為衆賓鄉大夫為主人與之飲酒而後  
升之故周禮鄉大夫職云三年則大比考其德行道藝  
而興賢者能者鄉老及鄉大夫帥其吏與其衆寡以禮  
禮賓之蓋古者年七十而致仕老於鄉里其為父師少  
師而教於學也常知鄉人之賢者是以鄉大夫就而謀

之以為介賓將獻其賢能則與之飲酒故鄉則三年一  
飲也然鄉飲禮有四若養老賓賢者特二事耳其三則  
春秋習射因而飲之以州長為主人故州則一年再飲  
也其四則國於大蜡祭而黨中於學飲酒黨正為主人  
故黨則三年一飲也俱謂之鄉飲酒

立賓以象天立主以象地設介僎以象日月立三賓以  
象三光三讓以象月之三日而成龜四面而坐以象四  
時故鄉大夫選其老而賢者立為三賓而立介以輔賓

立僎以輔主三賓之外年高者為衆賓六十者坐五十者立六十者三豆七十者四豆八十者五豆九十者六豆

主人親造三賓者之家速賓及介而衆賓自從之主人拜迎賓介於庠門之外而衆賓自入三揖而後至階三讓以賓升主人盥洗揚觶賓與主人升堂主人北面再拜於阼階之上曰拜至拜訖洗爵而升賓再拜於西階之上曰拜洗拜訖賓又拜於西階之上以受爵曰拜受

主人拜於西階之上以送爵曰拜送賓飲酒既盡而復拜曰拜既然惟待三賓則然介之禮省衆賓又省主人尊賓故坐賓於西北而坐介於西南謂天地嚴凝之氣始於西南而盛於西北體天地尊嚴之氣以表賓之尊嚴也主人坐於東南而坐僎於東北謂天地溫厚之氣始於東北而盛於東南體天地之盛德以見主之仁厚也故曰四面之坐象四時也其禮則有祭薦祭酒齋肺啐酒卒鱗致賓之目其樂則有升歌笙入間歌合樂之

節其官則有司正之職其儀則有賓酬主主酬介介酬  
衆賓之序而終之以沃洗又終之以說履升堂飲酒無  
算然後賓出而主人拜送為禮之終序矣蓋飲酒之初  
皆立而行禮未徹俎故未說屨及旅酬沃洗既畢降階  
而說屨徹俎而坐堂行爵無數至莫而不廢事故經曰  
節文終遂安燕而不亂也黨正飲酒則一國若狂無不  
醉矣

樂歌之節其始則樂工入升堂歌鹿鳴四牡皇皇者華

每一篇而一終謂之升歌三終其以吹笙之人入於堂下奏南陔白華華黍每一篇而一終謂之笙入三終其次笙歌既畢而堂上與堂下更代而歌堂上先歌魚麗則堂下笙由庾堂上歌南有嘉魚則堂下笙崇邱堂上又歌南山有臺則堂下笙由儀謂之間歌三終間者代也謂一歌則一吹也其末則堂上下歌瑟及笙竝作若工歌關雎則笙吹鵲巢合之若工歌葛覃則笙吹采蘋合之若工歌卷耳則笙吹采蘋合之謂之合樂三終然

後樂工告之樂正樂正告之賓曰樂備工遂下堂而出  
乃立司正謂樂既備賓欲去為有懈惰故主人使相禮  
者一人為司正以監之將留賓而行旅酬也其用詩之  
意則嘉魚者取其以禮下賢者賢者累蔓而歸之與之  
燕樂也山臺者取其愛友賢為邦家之基民之父母既  
欲其身之壽又欲其民德之良也由庚崇邱由儀今亡  
未詳其義愚謂必亦取其萬物得宜如魚麗萬物盛多  
為太平之世可以待賓而興禮樂也賓必南鄉介必東

鄉主人必居東方謂獻酬之際主人將西賓將南而介則矇其間也矇音間廁之間

竊詳鄉飲大旨主於尚齒尊賢以厚風俗以明政教而已古人歲歲行之以為常後世間一行之以為異即見今之不如古矣淳祐丙午歲建昌嘗一行之時則郡守王公脩為主人今六十年再逢丙午部使者始令再行之其難如此宜乎尚齒尊賢之風不接于耳目而民俗日渝也孔子曰吾觀於鄉而知王道之易易也夫王道

大矣夫子乃因觀於鄉飲而知其為易何邪孟子曰堯舜之道孝弟而已矣二帝之道猶不過於孝弟况王道乎宜乎以此為易易也鄉大夫三年一獻賢能先與之飲酒則宋代鄉舉鹿鳴宴蓋鄉飲之遺意而其廢又三十年并此意不復得見矣古人制為此禮法天地象日月三光四時至詳且重亦有過於煩縟者則拜至拜洗拜送拜既之類是也謂宜於親遠賓介迎拜於門三揖讓升堂之後稍節其拜則簡而不倦矣且今一舉禮其

費甚夥有司以為病不知古人歲舉此禮費當何取當  
考大德丙午歲閏正月間盱庠奉憲令將以姑洗行鄉  
飲因考古而議其略若其詳則見本義

策問

四

問易曰積善有餘慶積不善有餘殃書曰天道福善禍  
淫又曰作善降祥作不善降殃聖經以善惡判禍福理  
也先儒謂其言無報應何也大學曰貨悖而入者亦悖  
而出理歟亦報應歟報應釋老之說也聖賢不廢歟有

曰報應若有神司之者纖微必察誅賞不違何冥冥之擾擾也此殆以人事擬天道固不足論或曰禍福無不自己求之者惠迪吉從逆凶惟影響人自為之天理順逆之分即人事吉凶之判是矣而亦有為善未必福為惡未必禍者何居或曰善惡未熟爾熟即驗矣審如是顏子之善不熟乎何其夭且貧也盜跖之惡不熟乎何其壽且富也不寧惟是鄧攸棄其子而全兄之子亦可謂篤於善矣無兒之悲使人流涕張湯杜周酷虐何可

當也而乃俱有良子且爵位尊顯至建武杜氏爵乃獨絕史謂蹟其福祚元公儒林之後莫能及蓋訝之矣善惡之驗竟如此此君子所以憤天道之無知撫遺編而浩歎也羣疑滿腹願從諸君質之

二

問古者仕進之途蓋非一矣周以鄉舉里選為正途至漢則孝廉賢良明經唐宋則詞章科目皆正途也然其間有以貲進者雖由徑亦多通顯何歟輸財助邊納粟

應令猶爲有說進瓜果人亦官之何義歟宋待進納者  
最有節不過假以浮名使由場屋特優其取予差易進  
身爾不使驟入流品也非公私兩利者歟無亦曰多田  
翁捐所餘數百斛計直幾何即獲與正途常選齒不衰  
吾名器歟一蹴而躡升則彼之賢勞鞅掌積日累月者  
得無觖望且寒畯乏資者復何由升歟自古奔走才能  
鼓舞豪俊惟名器爾昔有以官頗易得人思僥倖為世  
道憂者非以其輕名器歟懼其輕加裁制焉將以抑奔

競也或曰昔嘗急而求予矣今若此不慮後日復有急乎吾將微獎以示其信虛榮以慰其求則又曰數且夥其輕猶故也將若之何敢問

三

問學者之於書致疑多矣大者未易悉數也略舉其細有言語背馳者有紀載失實者有稱謂差殊者試與諸君商之夫子曰言忠信行篤敬子張書諸紳言行之重如此而孟子乃曰大人者言不必信行不必果異時夫

子亦嘗以言信行果為硜硜之小人是言行不足為重矣無乃言語之背馳歟門人曰子罕言利與命與仁利與命夫子誠罕言至于仁則屢言不一言未見其罕也無乃紀載之失實歟唐虞夏周國號主一未見其有二也繼夏者殷宜直曰殷而已然詩既曰殷士膚敏曰殷鑒不遠矣乃有時而又曰商之孫子曰肆伐大商書既曰殪戎殷曰勝殷殺受矣乃有時而又曰商郊牧野曰商王受是一國而二號當時之人不知何從梁本魏也

孟子之書易魏曰梁而齊晉則異乎是何於魏獨然無乃稱謂之差殊歟三者雖淺近其疑則一敢問

四

問理莫難明於鬼神矣謂為無邪傳曰幽則有鬼神謂為有邪孰從而究其迹也夫子曰焉能事鬼不過謂其未能事而非以為無也子不語怪力亂神不過不形之言語而非以為無也蓋有之矣然求所以有何其茫如邪晝歛喫噭世固有之抑以理而推有形而後有聲曰

有聲矣必附於形形何在歟曰無形矣聲何所附歟好  
言鬼神莫若左氏世多譏其誕至伯有之事又何若是  
著也然歟否歟審如是可謂之有矣乎中庸謂洋洋如  
在其上如在其左右如之云者其有無之間耶智不足  
以通幽明之故願祛其疑

詩說

至元辛卯秋予與故友易雪厓間遊南城鄉至歐橋訪

小谿周文郁名從周淳祐  
丙午中鄉舉因過坡下訪綵野黃衛道名  
闡

良成淳茂辰登科  
軍通判除權院就往金谿縣之曾坊訪平山曾仲材子  
仕至嚴州淳安令三先生者皆予舊識也前修雅望綽

有典型從容說詩各得一論足以補後學之闕漏今二十有七年矣雪崖翁壬辰歲先逝三先生亦相繼僊去  
宰木俱拱惟予僅存而亦年近釣璜懼來日之有限前  
聞之易亡也因摭其說載家集以示吾孫

小谿翁曰昔在行都訪白雲趙宗丞參詩法因問何以  
有盛唐晚唐江湖之分趙公曰此當以斤兩論如齊魯

青未了如乾坤繞漢宮如吳楚東南坼如天兵斬斷青  
海戎殺氣南行動坤軸如白摧朽骨龍虎死黑入太陰  
雷雨垂等句是多少斤兩比風暖鳥聲碎日高花影重  
即輕重見矣此盛唐晚唐之分江湖不必論也已而訪  
蒼山翁曾子實以趙公語質之曾謂趙公言是適有一  
客從旁竊笑心怪之而未敢叩異時徐問客何為笑曾  
公曰有故蓋白雲之說雖當顧其自作則起末皆未是  
客之所以笑也文郁請問歌行曾公曰凡歌行止合以

老杜為法其後又謁看雲翁黃希聲參詩黃公簡默莊  
重不事莊辯止云詩止如此做做來做去到平淡處即  
是又曰詩貴平淡做到此地位自知耳三詩人之所以  
語小谿者如此小谿以其說授予白雲譁崇嶠字漢宗  
壬午登科仕至大宗正丞卒于朝有子雲舍仕至撫州  
太守○蒼山譁原一字子實居寧都金精山前仕宋為  
南昌縣丞○看雲譁文雷字希聲淳祐庚戌登科居  
建昌城內仕至浙西提幹舟覆于嚴州城下遂溺死

予訪綵野黃樞院年八十有四矣精健不衰氣象溫雅  
有乾淳遺老風致忠厚之味藹然從容談詩有曰詩貴

平易自然最要血脉貫通有倫有序因舉梅詩牆角數  
枝梅云云又舉月詩騰騰離海角云云此二篇血脉貫  
通次序不差是一樣子也越二日往金谿訪平山曾公  
作詩多雄健於近世詩深取蒼山翁且云少謁蒼翁於  
行都翁曰君作豐大合作顛詩一番然後約而歸之正  
乃有長進問何謂顛詩曰若太白長吉盧仝是已然性  
不喜為此體竟不果學今老而思當時儻不以已見橫  
於胷次而從前輩之教用工一番則吾詩當不止此歎

息久之

予以諸老前後言語參玩乃知前輩作詩俱有節度如今人率爾五七字湊砌成章遽名曰詩宜其不足傳矣學不廣聞不多其何能淑予竊媿夫造詣之不深而又慮夫前世之不傳故纂其所聞以為詩說也日或嗣有見教者顧雖老憊猶願讀書延祐丁巳重陽日記於東軒

記安晚二字

顏蠋與齊王游食必太牢出必乘車妻子衣服麗都蠋  
辭去曰玉生於山制則破焉非不寶重也然而太璞不完  
士生於鄙野推選則祿焉非不尊遂也然而形神不全  
蠋願得歸晚食以當肉安步以當車無罪以當貴清淨  
真正以自娛宋丞相鄭忠獻清之晚年倦祿自號安晚  
蓋取諸此東坡嘗謂戰國之士未有如魯連顏蠋之賢  
者也然而未聞道也晚食當肉安步當車是猶有意於  
肉與車也晚食自美安步自適取於美與適足矣何以

當肉與車為哉坡翁此論尤高但蠋蓋有為而言之與  
曾子彼以其富我以吾仁彼以其爵我以吾義一例亦  
不害其為聞道也

水雲村彙卷十三

欽定四庫全書

水雲村橐卷十四

元 刘壎 撰

公牘

代包尚書申省乞朝假狀

咸淳丙寅

昨準尚書省劄子云云給假一月候滿前來供職者恩  
旨薦頒孤衷增感伏念某棲遲莫景眷戀明時清朝未  
忍於棄捐優詔僅蒙於予告恩綸稠疊寧忘魏闕之思

藥裹纏絲靡遂漢廷之恃今者年益加大病殊未瘳雖  
出入庭戶以猶艱豈奔走道途而無苦輒陳私悃俛念  
顛危欲望公朝特賜敷奏更與給假一月少需緩淑庶  
便老癃實拜釣造生全之賜

代申省乞蠲租免糴狀

咸淳戊辰夏鄉邑水災遠近艱糴人心洶洶予日慮  
冠禍六月初遷避建昌城中未久果聞嘯略四起八  
月八日賊破邑大焚略而去是時朝旨下江西運司

於諸郡和糴米數十萬石頒降官誥度牒銀楮四色  
為糴本數內建昌合糴三萬石南豐興焉予聞之惻  
然曰邑虛矣何堪重糴乎即思以救之適雲舍趙公  
必畧新注雩都宰歸亦寓盱城居相鄰因約其同謁  
鄉達尊包樞相恢陳尚書宗禮曾侍郎穎茂黃侍郎  
萬石易安撫士英請為聯銜列上於朝祈免糴又祈  
蠲租諸老俱然之陳公命予亟具橐以進即備公劄  
聞於賈平章似道未幾尚書省劄下盡從所請租糴

兩免次年春夏遂免艱食云

某等跼伏田里固身化鈞自安其愚詐容妄有陳述茲以事變出於鄉里事體關於朝廷冒昧籲呼仰祈鈞鑒某等生長建昌竊惟本郡山多田少素非富饒而南豐一帶又接閩贛民俗慄悍輕生習兵纔遇水旱無聊輒嘯聚稱戈負固挺亂致上煩于有司今年春夏以來積雨霖淫谿澗漲溢至四月乙巳大水五月壬戌又水拔屋宇衝田疇蓋四縣皆然而南豐則平原出水災變尤

甚東西彌望莽為沙邱牛畜種植多沒巨浸廩儲溼腐  
告糴孔艱於是強民結聚者四起州郡為之調兵鎮壓  
遣榜招諭而後定曾幾何日被水者修補廬舍未就葺  
理縣市未成忽八月初本縣管下峽村賊首羅動天等  
聚集完徒焚劫鄉落竟以初八日辰時掩襲不備長驅  
破縣虜略財貨婦女殺死宗室王民本縣無兵無城徒  
手受寇邑解市肆悉盡于烟燄之中生靈老少多斃於  
賊刃之下僅得尉卒數輩短兵巷戰而寡不敵衆莫遏

其鋒賊勢既長好亂者衆邑距郡不四舍朝發莫至蕩  
無隄防近城居民率竄城內傍連贛撫屬邑如寧都宜  
黃無不震動弱者徙家遠遁強者團結自防州郡始調  
廂禁寨兵結約隅總邱應祿胥廣趙集義兵攻圍賊洞  
幸擒元惡已正典刑同黨羣兇或逃或捕既而憲司軍  
馬踵至雖可少安然郭內則瓦礫蕩然奠居無所諸鄉  
則側受寇燬茅葦相連生者骨肉流離死者肝腦塗地  
甚可痛也某等竊念南豐自紹定己丑廖寇兵火之餘

凡二十年創痍僅起而寶祐戊午之張冠起焚蕩劫略  
一夕為虛郡家急於繭絲草草收拾甫及十年痛猶未  
定而羅冠繼起四十餘年三經殘破寒厓赤子斬然無  
一縷生意秋成納稼民食所關而始以洪水之漂流繼  
以兇燄之焚略又繼以軍馬之蹂踐田疇刈獲能有幾  
何況邑之宿儲空於水鄉之積貯空於劫市井之生聚  
空於火疾痛呼天安得不仰祈一分之寬乎共惟寬大  
之朝仁恩旁達元勲當國澤及隱微凡州縣兵荒每拜

存撫今南豐水盜兵火交逼沓至尤宜興憐欲望公朝  
曲垂軫念特降旨揮行下建昌軍將南豐民戶二稅蠲  
免一年其本軍和糴米年例四縣總計三萬餘石併乞  
劄下江西轉運司行下本郡將南豐一縣今年合糴之  
數特與除豁令運司收回糴本庶幾寬恩所被民力獲  
紓亦見本朝仁遠之意願望釣慈亟賜報可某等當與  
下邑黎庶永戴洪恩干犯鈞嚴下情不勝俛伏俟命之  
至咸淳四年十月日右武大夫閻門宣贊舍人主管華

州雲臺觀易士英朝散郎集英殿修譔黃萬石通奉大夫寶章閣待制曾穎茂文華閣直學士大中大夫陳宗禮資政殿學士通奉大夫致仕包恢劄子

是年十一月尚書省劄子下建昌軍仰將南豐縣民戶咸淳四年夏秋二稅蠲免一年外仍劄江西轉運司行下本軍將南豐縣咸淳四年和糴米照數蠲免收回糴本併劄送包資政等官准此

代申省為陳參政請謚狀

竊惟聖經存節惠之文清朝有錫謚之典所以旌別淑  
慝昭示來今儻非依賴於鈞陶何以輝光於泉壤伏念  
先君樞參資政年垂七袞歷仕兩朝清介方嚴不混流  
俗平生勁直之節著在朝廷簡靜之政行於郡國為學  
官因冬雷上疏語侵大臣鄭丞相惡之而斥為宰屬因  
陳四大願厯詆時事丁大全惡之而又斥景定更化天  
日清明起散地乘輶傳觀風嶺海一道肅清中間雖以  
詩語為御史虞處所誣徙居二水而元宰當國察其非

辜曾不踰年尋叨擢用由庶僚而登言路由言路而升  
從班彈擊不避貴權論思必主正大一時忠言讜議以  
之為首端人雅士以之為宗出帥羊城以清約洗貪風  
以安靜鎮遠俗至今南人歌思靡忘暨登廟堂守正不  
變雖莫究大用而天下善類識與不識翕然以名節稱  
之其持身處事治家居官皎皎無毫髮磨玷至若讀書  
講道勤苦自厲則壯老猶一日也公朝為之贈官加賻  
恩全始終亦既哀榮無憾矣永惟墓草已宿壹惠未章

不肖孤零丁待盡弗克顯揚深懼先君名實與草木俱腐無以贖不孝罪謹繕寫行狀一帙叩首百拜以請欲望朝廷優賜矜念或蒙特達密啟徑降恩旨為易其名或蒙下之有司從公議謚豈惟不肖孤誓報洪恩九原有知亦將永永戴德其無斁某冒犯鈞嚴下情不勝俛伏俟命之至

呈州轉申廉訪分司救荒狀

大德十年丙午歲春夏間江浙大饑吾邦與鄰郡皆

然景象惡甚予不能安條其事上於郡適分司官至  
因以聞

竊惟民間或有疾苦學校所當開陳本州歸附三十餘  
年多遇豐歲民各安生亦曾間有艱糴之時然止是小  
歉不至大傷惟有今年凶荒特甚豈非歲在丙午自古  
以為危會邪即今饑民充塞道塗沿門乞食扶老携幼  
氣命如絲菜色雷腹行步傾倒一村一保之間兒號婦  
哭所不忍聞蓋緣此州本是窮原去處山多田少地狹

民貧雖遇豐年猶有不給自大德四年以來連年不熟罕有積儲至七年八年則旱損其半九年則蟲傷尤多民戶輸糧還債之外所存無幾上年臘月農家多已無飯度歲矣苦捱至春又遇雪凍閏月以後淫雨連絲至三月二十一日夜半西鄉峯嶺等處山水發洪衝田拔屋莽為沙邱如秧如麥俱已蕩盡沿河一帶彌望蕭然常年猶有鄰境可以通融今則鄰路俱荒四境斗絕常年猶有蔬菜可以助食今則久雨浸淫蔬菜腐死常年

猶有客船運米可以接續今則州民前往下江販運多  
被龍興撫建閹遏不許到州常年米碩價止中統鈔一  
十兩糴戶猶曰艱難今則價值日增倍而又倍且又夾  
雜水濕沙糠春簸之餘一斗僅得七升而已以此展計  
每碩乃成三十兩之上小民久困鈔從何來以至將屋  
宇園畲絲麻衣服牛犁器具甚至猫犬等物俱已典賣  
應急自春至夏歷日滋久蓋亦罄竭矣且糧多之戶不  
免猶有缺食者耕農之家困乏可知弱者忍饑待盡強

者率衆開倉或有百十為羣突入大家升堂入厨需求  
飯食必待烹豬給酒醉飽乃去既曰饑民誰能抗拒亦  
且數衆叫囂震驚以此稅戶亦不妥居往往搬移回避  
景象殊惡蓋三十年所未見也居是邦者廩廩度日幸  
蒙省府矜卹累次發糶官糧儻非得此賑饑則餓死久  
矣又奉榜文委官勸糶伏覩辭意哀矜懇切洞察民病  
百姓見榜歡聲如雷以至感極而泣然官倉所糶每戶  
多者五斗少者一二斗而止略計人口不同大槩僅充

五日之食所食既盡又只忍饑今纔五月上旬相去秋成尚遠兼本州山深地寒止宜晚禾惟有近郭鄉村略種早稻通計十分之內早稻止有三分各濟本鄉何能普及近為大水衝田之後補插稻秧比常年栽插之時甚為遲緩恐至七月纔見收刈况又未卜有收無收凡人一不食則饑再不食則困三不食則餓且死豈能空腹忍死待秋熟乎至如遠村止種晚禾直到秋冬之交然後成熟似此饑荒正長委計利害今則未論秋後且

慮目前若不多方措置不惟餓死者衆亦恐別生事端  
倍費有司處置伏見本州官糧除已糴出及存留年終  
支持外尚有餘牘乞行照勘數目接續發糴拘錢還官  
仍乞申覆省府乞於糧多路分轉撥萬石儕運前來接  
濟亦是損有餘補不足之意就乞行下龍興撫建諸路  
放行米船毋得阻遏均是江西地面一般饑民何忍妄  
分彼我瘠魯肥杞也其有富戶蓄米待價固是愚而無  
知不卽禍敗理宜督勒隨時平糴庶免後患可保家業

至若姦民不畏官法乘時放強鼓動惡少不問物主擅  
取倉禾此風亦不可長所宜折其萌芽合無多出榜文  
嚴加禁治嘗聞古人救荒有法凡禁治閑糴之戶強糴  
之民必將二事並行蓋以安富恤貧不至偏負如某所  
陳似涉激切然事急不暇徐行心痛不及緩聲如言可  
采早望定奪實一州生靈之幸伏乞照詳施行

是年省府節節行下糴糧又專官親臨賑濟孤貧者  
分遣郡官下鄉勸諭大家減價發糴郡侯聶公伯達

名從政懇惻奉承秋毫無擾貧富安之又勸農競種  
蕎麥為明年續食計所收甚廣暨丁未歲民得麥續  
食不復有饑由是兩歲雖歉而獲免溝壑者皆公家  
全活力也

建請改葬鄉賢游澧州狀

竊惟尊禮先賢國家之令典建明義事學校之公言伏  
見南豐志該載先賢數內有故澧州太守游大夫諱少  
游文學政事為時名臣亡歿之後已行蘊葬經今百年

昨因至元己丑庚寅間兵寇擾攘將本官墳墓發掘破  
棺取物衆皆見其金紫儼然顏貌如生衣服俱被剝去  
屍體棄於道傍子孫凋零無人收瘞鄰近憐其裸露就  
將浮土略為掩藏不復再行正葬今則又歷年深雨水  
浸淫牛畜踐踏此去日久必復暴露矣生前既是品官  
身後豈宜如此本處亦有善人肯為出力遷葬却為未  
曾聞官由此未能輕動本官元葬新城者接連玉泉地  
面有玉泉耆儒人黃貢元名猶方讀書知禮樂為義事

謂宜委之此人倡率鄉里仁人義士及游門宗親協力維持製造棺衾將本官遺骸裝斂入棺加以釘線灰漆如法封閉結砌墳穴用石蓋壓務令完牢仍於墓前鑄石明書澧州太守游公之墓致祭妥奉以表先賢則澤及朽骨風厲薄俗誠州郡之美事也

講究隄備湖寇事宜狀

竊惟江海湖泊水面闊遠蘆葦阻深致有盜賊出沒從古不免而近年為尤甚剽劫商旅損傷官員非止掩其

資財又且占其妻子尋輒無處生死衙究今者李某所  
陳件件皆實原其事理蓋緣賊船盤據水中巡尉遠在  
岸上追捕縣隔力無所施又賊船民船混雜波心雖有  
智者不能辨認為今之計謂宜別立水路巡捕司驗地  
面遠近節節置立使聲勢相接首擊尾應給以官船日  
夜巡哨其有雇覓民船裝載者宜依李其所陳令本人  
經官告給印信勘合及用火印烙船參照相同見得某  
處某人管下附籍船戶如此明白若或船無火印及無

勘合即是賊船顯然彰露自無所容而水盜因可弭矣至如船居之戶規避差發則宜印烙其船及依土居粉壁例置立粉版開寫戶貫人口官為置籍時常點視非止官府得以役使而姦盜不至窩藏此又一舉而兩利也其要在乎講之周密行之堅決又須嚴立法禁隄防巡捕司與賊交通之弊庶可戢水盜護良民惟執事者實圖利之生靈幸甚

水雲村橐卷十四

欽定四庫全書

水雲村橐卷十五

元 劉壇 撰

表箋

壽節賀表

景定庚申正月五日

獻歲發春挺生真主與天齊壽恭祝聖人矧臨啟運之  
年有衍興王之慶恭惟剛健中正神武聰明三紀四方  
無虞丕暢久成之化九夷八蠻通道克開底定之勲適

虹電之交輝等乾坤而同永臣分藩有守造闕無繇藝  
祖開創於庚申願恢令緒帝舜誕彌於甲子期邁修齡

謝賜歷日表

景定甲子

仰觀天文協用五紀以為民極賚及萬方蒙帝力以何  
知表人時之敬授恭惟誠參化育道妙裁成膺歷數以  
在躬契合六十年之興運察璣衡而齊政環循三百載  
之太平正朔誕頒車書咸被臣職司勸課志在布宣云  
云

紹陵誕嗣賀表

成淳戊辰十月一日

乾萬物之資始式開有道之長震一索而得男不衍無  
疆之歷甸區嘉賴宗社奠安恭惟德澤延洪仁恩涵育  
忠厚成其福祿克底烝民之生孝弟通於神明宜接千  
歲之統告朔適當於良月流虹遂應於前星臣老佚里  
居遠欣邦慶二十九得皇子同符先漢之頌歌億萬年  
敬天休永邁成周之歷數

賀太后

德合重坤仰詒謀而翼子祥開索震爰受祉而抱孫宸  
辰來朝慈幃增喜恭惟得天久照應地無疆壽考萬年  
用介福於王母本支百世肆遺休於後人遙知問寢之  
歡坐享含飴之樂臣身棲南畝心戀東朝誦太任思齊  
之詩於昭積慶效湯孫猗那之頌式衍丕基

賀皇后

宮幃雍穆肇美蟬繩廟社靈長為生岐嶷仰離明之繼  
照表坤厚之含光恭惟如月之常配天其澤審官賢佐

君子助成化育之功帥嬪御祠高祺協應誕彌之瑞凡  
皇祚繙於百世由化基本諸二南臣幸佚餘年欣逢慶  
事祝帝堯之多子有偉貽謀頌太姒之嗣音永言齊壽

正旦賀表

咸淳庚午

歲協祝釐頌九州之正朔帝臨垂拱朝萬國之衣冠自  
天降康與民更始恭惟日新盛德春育涵生六年受五  
服之朝混同文軌一氣轉八荒之壽增壯山河適當黃  
道之中宜處青陽之左臣歸田身老戀闕心存王春受

漢京之圖莫陪正伏吉月布周邦之治第仰寬書

太后

月正元日尊臨南面之居天下一家同致東朝之慶慈  
顏有喜景福無疆恭惟與物為春後天不老龍樓戒曉  
日膺問寢之儀雉扇開雲歲舉奉觴之典九重稱賀萬  
國具瞻臣歸老邱園馳神集闕四時成歲欣逢交泰之  
期五色補天端賴重坤之助

皇后

王者大一統式迎泰道之亨太極有兩儀允賴坤元之載歡騰柏頌喜溢椒塗恭惟化基二南仁育萬物正位乎內助宣太皞之春申命自天均迓元正之福對龍杓

之易次仰鳳闕之受朝臣昔侍西清今安南畝想紫禁烟花之繞莫綴班聯瞻黃道日月之明遙依魏闕

壽節賀表至元戊子八月二十八日

乾統天而乘六龍光臨率土兑正秋而說萬物瑞應流虹聖明挺生遐邇胥慶欽惟寬仁撫世神武興邦如月

之恒日之升同符久照際天所覆地所載咸入洪圖福  
鎮關河壽齊箕翼臣分藩有守望闕無由致嵩嶽之三  
呼第瞻北極指軍峰之萬仞遙祝南山

又至元己丑

乾元御極運應河清兌正司秋節逢電繞萬年介福四  
海均驩欽惟光岳儲神箕翼同壽為天地立心生民立  
命共樂治平凡日月所照人力所通悉陶化育祥開誕  
聖慶衍齊天臣忝牧一州恭瞻九陛歸美報上莫親奉

於玉卮以忠事君尚遠稽於金鑑

登極賀表

至元甲午四月

天子君萬邦遹衍符厯數皇極斂五福誕覆幅員華夏徵  
聲乾坤喜氣欽惟與天同大如日方升聰明睿智以獨  
尊登九五位朝覲謳歌之並集得億兆心宗社安於泰  
山詔令聳乎率土丕昭祖訓光御皇圖臣叨守外藩遙  
瞻中禁又逢聖主逾殫莫報之忠嘉與遠氓共樂昇平

之治

又 萬戶府

金定四庫全書

卷十五

明帝御邦嗣累朝之丕緒黎民有主藹萬國之歡聲廟  
社奠安乾坤開霽欽惟純粹中正濬哲文明鍾三光五  
岳之英天姿特異為六軍兆姓之主神器有歸奉烈祖  
之聖謨膺皇躬之景命時乘龍御光紹鴻基臣濫職柳  
營馳神楓陛爰飭采薇之戍謹守封疆敬歌天保之章  
願綏福壽

壽節賀表

甲午九月五日

虹電流輝適應九秋之候乾坤齊壽有開萬壽之期瑞  
氣氤氳頌聲洋溢欽惟睿知神武博厚高明天日英姿  
鍾太極兩儀之全氣風雷嘉會協六軍萬姓之歡心當  
新政之御圖紀良辰之毓聖誕彌厥月長發其祥臣分  
牧南邦馳神北闕瞻蓬萊之五色阻綴賀班效嵩岳之  
三呼遙伸善頌

又 萬戶府

龍飛御極甫新一統之權虹流介祥咸仰九重之慶歡

騰薄海瑞靄層霄欽惟載纘武功誕敷文德撫軍監國  
久符重暉重暉之占應天順人善繼同軌同文之治茂  
介秋高之候有開帝出之辰臣靡職柳營馳神楓陛千  
官朝賀遙瞻漢殿之班萬旅歡呼共上莊屯之祝

正旦賀表

元貞乙未

歲頒寶曆大一統以為元春度玉墀喜萬年之介壽和  
熏海岱喜溢乾坤欽惟德與日新仁同天覆車書混一  
睿知足以有臨正朔昭明華夏罔不率俾儉勤遵夫祖

訓愛敬說於親闈茂對青陽益臻洪福臣職分藩服心  
戀闕廷膺貢受圖雖阻陪於朝會行慶施惠願祇布於  
恩言

又 萬戶府

東風轉律又新萬物之輝南面受朝茂介九重之慶聖  
朝臨御華夏瞻依欽惟稟睿自天性仁繼祖修車馬備  
器械八紘不振於皇威開黃道拜紫宸百辟共推其神  
武當持盈守成之世逢考圖數貢之辰壽祉駢臻基圖

鞏固臣屬靡軍務阻綴廷班詩詠采薇恪守封疆之戍  
春融細柳常懷雨露之恩

壽節賀表

總統所

華袞天臨喜親逢於明主方袍雲集咸恭祝於聖人運  
應六龍之乘生同一佛之出欽惟慧通山海福比河沙  
累劫萬行圓成為世界主大地衆生歸仰居人中尊當  
秋高氣清之時紀電繞虹流之節壽齊箕翼慶溢乾坤  
臣祇率梵徒遙瞻宸御真誼五千卷敬繕貝多葉以披

宣睿照億萬年願北須彌山而長久

又 九月五日

虹渚紀祥九五適符于令節象筵啟教億兆齊謁於頌聲飛龍御天生佛見世欽惟獲無量福居不動尊因果圓成作大地山河之主智慧廣大為當世天人之師先囊萸四日之期應曇花千年之瑞光騰箕翼喜溢乾坤臣寄蹟南邦傾心北闕領苾芻衆敬宣覺帝之真詮繞蓮華臺齊祝聖皇之上壽

登寶位賀表

大德丁未

六龍在御初臨南面之朝萬象維新咸拱北辰之照皇  
圖輩固甸宇欣愉欽惟淵懿聰明睿知神武鍾三光五  
岳之全氣繼祖嫡傳得六軍萬姓之歡心受天寶命孝  
愛首尊於慈極寬仁誕布於多方膺謳歌朝覲之歸副  
宗廟社稷之託臣忝紂郡駁恭被詔綸歷數在躬所願  
跨商周之世福威惟辟何幸逢堯舜之君

太后冊寶賀箋

同

神受寶冊正萬國之母儀帝奉玉卮開億年之聖壽宮  
闡喜氣穹壤歡聲欽惟道協媧皇德高文母如天之運  
定大策於禁中挾日以升福羣黎於宇內既措安於神器  
宜誕受於鴻名盛典輝煌慈顏忻懌臣糜身南服稽  
首東朝擁佑有功永昌九重之侍養對揚無斁共欣千  
載之會逢

東宮受寶賀箋

帝臨玉宸新膺昕陞之朝天受寶符首正春宮之位慶

絲宗祐歡動甸區敬惟機神英明性質仁厚娛侍太母  
鵠和氣於宮闈擁戴聖皇著殊勲於社稷宸眷篤怡怡  
之好淵衷定繼繼之謀瑞協龍潛祥開燕翼某身糜支  
壘心遡賀庭重光重暉喜羣情之有屬同文同軌占大  
厯之無疆

尊號賀表

至大乙酉四月

南面視朝啟玉宸而臨御東宮考禮煥寶冊以推尊仁  
治萬方歡騰八表欽惟德配天地孝通神明得位得祿

得名光昭烈祖重光重輪重潤敷佑後人履端誕受於  
徽稱渙號遄頒於慶賜聖朝崩見縟典增輝臣忝守偏  
城欽承明詔進官一列喜均被於隆恩祝壽萬年願常  
熙於鴻號

壽節賀表 己酉七月

律轉清商適金行之肇序位尊皇極紀電繞之呈祥福  
祿駢臻朝野胥慶欽惟聰明作后寬惠愛人天下同軌  
同文新崇徽號王言如綸如綺誕播洪恩勤問寢於龍

樓永貽謀於燕翼式逢瑞節不衍者齡臣分牧南邦馳  
神北闕三呼祝壽阻親奉於玉卮百拜盡恭願常瞻於  
丹宸

東宮生日賀箋

三月三日

瑞啟龍潛光應斗樞之繞歡均鼇掖時當天氣之新福  
祿駢臻朝野胥慶敬惟英明冠世神武安邦贊一日萬  
幾之權允熙庶績慕二帝三王之學博采羣書欣際昌  
辰益隆壽祉某等屬縻州壘阻綬庭班遙祝千齡衍本

支而益茂恭陳百拜仰華鄂之相輝

延祐丁巳肆赦謝表

周王敗後

立愛惟親特厚宗藩之眷宥過無大誕均甸宇之恩詔  
下九霄歡騰八表欽惟堯仁濟衆舜德好生追懷棣鄂  
之華忍遺厥後曲軫茅封之貴弗麗於刑憐其註誤之  
情錫以虧除之澤宏敷曠蕩溥及隱微臣職謹布宣心  
同欣躍雷雨作解同熙一氣之春日月照臨永衍萬年  
之福



水雲村橐卷十五